

Txitu-ò

Paulo Tyyriti Txitu-ò

1 ¹Jiarĩ Paulo rare. Deuxu deòdu rare. Jesuisi Kristu riwamyre inatyhyna aritĩnynekemy. Kia tyhydĩyña, Deuxu tarasana mahãdu hõrõ rare. Kia ityhydĩyña dee inyõ rierykeki, rityhynykeki, Deuxu deewimy tii rarekre. ²Umytuedeõnahakỹ iny riraòmyhỹre. Deuxu dori tuu rarybere ihetxi bedeu. Deuxu heka tiu raruiõtýhy. ³Ibededĩyñana òbiti dehemynde, Deuxu aõmydĩyñana rarybekemy rotĩyñyre. Kia aõmysĩdĩyña wadee Deuxu riwahinyre, iny tarasadurenymy rybe-ò. ⁴Txitu-ò kia warybe rewahinyra. Kai iny-wana Deuxu tetyhynyteri, kia dori inatyhymy wariõre wesemy tate. Deuxu, iny tyby-ribi, Jesuisi Kristu, iny tarasadu-ribi, Deuxudeysana-di, ywina-wana adee kanakemy watxireri. ⁵Inyaõmydĩyñana biòbitinykemy dori adee adiride. Kreta bede-ribi rõhõnyreu, dori waaõmysĩdĩyña rehuõre. Kia-ki dori kowa-di anaride. Ibutumy hãwã hãwã-ki ityhydĩyñdu mahãduy-ribi kai matuari mahãduõ bimýke. Iwese jiarĩ rarybere wese kai bimýke. ⁶Matuari òbiti bimýkre. Matuari ihãwyw sohojiõ rỹira bimýke. Inyõ ityhydĩyñdumy riõrenadule bimýke. Iriõre iõraruluukeki, iehehekeki, kia hãbu bimýõke. ⁷Ityhydĩyñdu mahãdu yrubudĩyñdu òbitilemy dori ihỹkemy. Inyõ-ki heka ibinamy mahakeki, imynyõmy. Tii dori, Deuxu dee raaõmysĩdĩyñkre. Ixidile nohõtídu mynyõmy. Hãbukyara rybebyby, mynyõmy, vĩ luudu aõkõ, hãbu aõbinaluudu aõkõ, hãbu ityhymy nohõtídu aõkõre. Kia mynyõmy. ⁸Iny inatyhyle, òbiti luunadule, taroraludu-ò awire mahãdu, iny aõwityhy luunadule, ixiwedule, Deuxu rybe tyhydĩyñdu, kiale bimýkre. ⁹Deuxu rybe-di kia hãbu òbitimy rõhõtínykre, òbitityhylemy riernanykemy. Inyõ ierysydĩyña rityhynyõkeki, erydĩyñdu irayky riywinykre tai ihewo-ribi rieryke, rityhynykemy. Tule iny iwitxira erydĩyña-di rarybemyhỹreki, tii riòbitidĩyñyke. ¹⁰Iny sõwemy inatyhymy rityhynyõreri. Tii dori aõna aõnalemy rarybemyhỹre, ityhydĩyñdu mahãdu riitxenanymyhỹkemy. Kia mahãdu-ribi, judeu mahãdu ibutu ratyre kia aõna aõnamy rotĩyñnymyhỹre. ¹¹Inyõ kowa mahãdury riyrykemy tamy rarybeke. Iny sõwemy heka

riitxenanymyhÿre. Òbitimy aõkõ heka iny riernanymyhÿre. Nieruòle heka iny riernadÿÿnymyhÿre. ¹²Kowa mahãduõ, ierydÿÿduõ rarybera:

—Inyboho, Kreta bedeludu mahãdu, ibutumy ruidu roire. Irõdu brebuna wese iny roire. Inyboho heka teoruxere roire. Byrelemy inyboho rõhõtinynehÿrenyre.

¹³⁻¹⁴Aõmybo kahãbu rarybera heka inatyhy rare. Urenana tahe arurumy rityhynkemy. Judeu mahãdu ihetxiu ijyy-ribi tõhõtireny rosakemy kai marybeke. Hãbu mahãdu bede ywina rityhynyõkemy. Kia hãbu dori inatyhyna aõkõ rityhynyre. ¹⁵Òbiti mahãdu dee ibutu òbitire. Ityhydÿÿdukõdu mahãdu-ò aõ aõkõ òbitire. Tõhõtinareny dori aõbina binalemy rõhõtinynehÿre. Aõu tii rexieryre aõbinahakÿ riwinykemy. Deuxu-ribi tõhõti rosare. ¹⁶Tiiboho rarybemynehÿrenyre: —Deuxu inyboho reeryrenyre. Tiiboho tahe Deuxu erydu wesemy aõkõ aõna aõnamy rotÿÿnymyhÿrenyre. Tiiboho iny riojinyrenyre rybemy reõbyõlemynehÿrenyre. Aõwiwihikÿ widÿÿ rieryõrenyre.

2 ¹Kai, Txitu, aõernawihikÿdibo biernanymyhÿke. ²Matuari mahãdu kai biernanyke hãbu ixiwedu mahãdulemy roirelemy, ywimy nohõti wydynadu mahãdu roirekemy, òbitilemy rityhynkemy, ibutu òbiti luukemy, iixiraterekemy. ³Senadu mahãdu tule biernanyke iyrubumy rÿikemy iujõmoõmy rÿikemy, tule vÿi luuõmykemy. Aõernawihikÿdibo biernanybenykemy. ⁴Hãwyy tÿmyra hãbumy heridu tÿmyra tahãbu luukemy, tariõre luukemy, kia senadu mahãdu riernanykre. ⁵Tuu iyrubumy rÿikemy, òbitimy raraykynymy rÿikemy, taheto riywinymy rÿikemy, awimy rÿikemy, tahãbu rybe riywinymy rÿikemy. Kia wesekeki, Deuxu rybemy inyõ ibinamy rarybeõtyhy. ⁶Weryrybõ mahãdu tule biernanyke iyrubumy rÿikemy. ⁷Kai, Txitu, aõna aõna wiwihikÿmy botÿÿnykre, tai tahe ityhydÿÿdu mahãdu awelese aõna aõnamy rotÿÿnykre. Kai biernanykeu, òbitilemy inatyhymy biernanykre. ⁸Arybe òbitityhydile biernanykre. Tai tahe aõludu raixÿrukre aõmy dori umy rarybeõtyhy. ⁹Kai biernanyke urideõdu mahãdu tawedu rityhynkemy. Tamy awimy raaõmysÿdÿÿnykemy. Tamy heka rorawyõdÿÿõtyhykemy. ¹⁰Rawasinyke aõkõre, ibutumy òbitilemy riwinykemy. Kiawesekeki, ibutumy Deuxu inyтарasadu deewimy riwinykemy. ¹¹Deuxu taerydÿÿna-di taluuna ibutumy iny-ò rexideõsinyre. Taluuna tahe inyтарasana-ò rehemynymy raremyhÿ. ¹²Kia heka iny tuu robikeu, awimy erydÿÿna rahake. Riwaernanymyhÿ aõbina bina widÿÿmy tule òbitina-di yrubudÿÿna-di iny rariakemy kabede-ki. ¹³Tule iny riraõmyhÿrenykemy iny Deuxu wihikÿ iny тарasadu Jesuisi Kristu loosõnatyhywo-ki kedehemnykre. ¹⁴Iny õwymy dexiwahinyde iny õraru õwydÿÿrenymy. Kiawese heka iny riwyre idi riratisebenyre iny ijoi lyrahakÿ ixidee rimyre. Kia ijoi iluure.

¹⁵Kai, Txitu kia aõna aõna inyko belyyke. Tai Deuxudeewimy riwinykemy urenana rakatxirenykemy. Iny biernanykre. Iny biõbitinykre. Iny ibutumy rityhynkemy matxibenyeke.

3 ¹Kai ityhydÿÿdu mahãdu xixi bitõhõtijeranyke ibutumy hãwã dinodu, bede dinodu rityhynkemy, tabede ywina rityhynkemy. Tule aõmysÿdÿÿnana

wihikỹ riywinykemy. ²Modee heka ibinamy rarybeõtyhy, raaõbinanyõtyhy ywimy rarekemy, moheka iehehemy riywinyõmyhỹre. ³Inyboho heka tule iehehe roiremyhỹ, itxỹtemy roiremyhỹ, òraruluunamy iny riitxenanymy roiremyhỹ, òtaluummy roiremyhỹ. Aõbina bina luummy iny wixira aõna aõna-di wii risynymy roiremyhỹ, wideramy roiremyhỹ. ⁴Tahe Deuxu iny tarasadu luuna, ruxetõena-wana inydeereny dehemynydeu, tii kia-ribi iny ritarenyre. ⁵Kia aõna aõna wihikỹ iny riwinyrenyreki aõki, iny Deuxu ritarenyre, taluuna-di tahe iny ritarenyre, Jesuisi òraru-ki xiery heka Deuxu riwatỹmyranyre Tatytybytyhy-di. Umytỹmyra riwahinyrenyre, riwasuhõrenyra. ⁶Tatytyby inydee riwahinyre Jesuisi Kristu iny biu-ò hedureki. ⁷Kiawese iny riwaõbitinyrenyre taluuna-di. Katahe inyboho umytuedeõna ijõdire. ⁸Kia heka inatyhy rare. Ka aõna aõna bierynanytyhykeu, tahe wadee awikre. Kia wese Deuxu ityhydỹyõdu mahãdu aõwihikỹlemy rõhõtynymyhỹke tule rewinymyhỹkemy. Kia heka awire. Kia iny riwiõhenanymyhỹre. ⁹Yraxina itxỹte kai rỹyraxidyõõmy, iwyõdỹyõõmy, rybe jei-ribi irehemy mabekre, tule lahi òraru rybe-ribi. Kia rybe aõ aõkõ rare. Awi aõkõ rare, iny riwiõhenanyõtyhy. ¹⁰Hãbuõ rybe õwe õwe-di ityhydỹyõdu rierynanykeki, aruru rybemy tamy marybeke. Kai inatxi rybemy marybekeki, tii rexiõbitinyõkeki, tahe uritere aõna aõnamy tamydỹyõõmy. Tii òrarudu dori ratximyhỹre. Hãbu õbiti aõkõ. ¹¹Tiile rieryre tuudỹyõdumy ratximyhỹre.

¹²Jiarỹ, Txitxiò, Atema-wana aõrysomy ariteõnykreu. Niõpõli hãwã-ò wadee manakre. Kowa arasỹnykre ibutumy biu bedeu. ¹³Zena, bedeu ywina erydỹyõdu, Apõlo-wana kai itỹinareny-ò biteõnylebenyke aõmybo tamy biwahinymyhỹke. ¹⁴Bierynanyke iny aõmysỹdỹyõ wihikỹkemy rotỹynymyhỹkemy. Kia wese aõbo rauhenyneri tamyreny ijõdikre. Tai riwiõhenanykre.

¹⁵Ibutumy kaki jiarỹ-wana iny rybe weityhyna adee rewahinyrenyneri. Warybe biwahinyke ibutumy inyluudu ityhydỹyõdu mahãdu-ò ibutumy adeereny Deuxu deysanamykre. Kie.